

Naalakkersuisut matumuuna Inatsisartut suleriaasianni § 33 malillugu aalajangiiffigisassatut siunnersuut imaattoq saqqummiuppaat:

**Qitiusumik Inuit Nalunaarsorsimaffiat pillugu inatsisip allanngortinnissaanut Inatsisissamut, Kalaallit Nunaanni folketingimut qinersisarneq pillugu inatsimmut aamma Folketingimut qinersisarneq pillugu inatsisimmut siunnersuummi aalajangersakkat ilaat Kalaallit Nunaanni Namminersorlutik Oqartussat ilanngunnissaannut Inatsisartunut aalajangiiffigisassatut siunnersuut (Danmarkimi Kalaallillu Nunaanni inunnik Kalaallit Nunaanni Namminersorlutik Oqartussanit imaluunniit qallunaat naalagaaffiannit naalagaaffiup avataanut il. il. aallartitaalluni peqqusaasimasunut kiisalu Danmarkimi Kalaallillu Nunaanni folketingimut qinersinermi allattorsimaffimmut ilanngunnissamut tunngatillugu najugaqarnermut nalunaarsortinneq)**

(Naalakkersuisut Siulittaasuat)

## **1. Aalajangiiffigisassatut siunnersuutip imarisaa**

1.1 Siunnersuummut pingaarnertut tunuliaqutaasut aamma ajornartorsiutaasooq Inuit Kalaallit Nunaanni Namminersorlutik Oqartussanit imaluunniit qallunaat naalagaaffiannit peqquneqarnermikkut aallartitaasut aallartitaanermi nalaani Kalaallit Nunaannut atassuteqarnertik attatiinnarsinnaagaat Naalakkersuisunit Social- og Indenrigsministeriaqarfiusimasumut (maannakkut Indenrigs- og boligministeriaqarfiusumut) qinnutigineqarpoq.

Aalajangiiffigisassatut siunnersuummi siunertarineqartoq tassaavoq, inuit taakkulu ilaqutaat Kalaallit Nunaanni Namminersorlutik Oqartussani atorfeqartut naalagaaffiup avataanut aallartitaallutik peqquneqarsimasut aallartitaaqqanermilu nalaani Kalaallit Nunaanni najugaqartutut inissisimasuusut, inuttulli taakkulu ilaqutaasut qallunaat naalagaaffianni atorfeqartuusut naalagaaffiup avataanut aallartitaasimasutut aallartitaaqqanermilu nalaani Danmarkimi najugaqartuusutut inissisimasutut pisinnaatitaaffeqassasut inatsisiliortoqassasoq.

Kalaallit Nunaanniit aallartitaasut qallunaat naalagaaffiannit Danmarkimi najugaqartutulli aallartitaasimasutut inissisimanerat naligiisinneqassaaq. Taamaattoqassarlu Kalaallit Nunaanni Namminersorlutik Oqartussat imaluunniit qallunaat naalagaaffiat aallartitsisuugaluarpat. Kalaallinut atassuteqarnertik attassinnaasariaqarpat. Tamanna anguniarlugu Qitiusumik Inuit Nalunaarsorsimaffiat pillugu inatsit, Folketingimut qinersinermut inatsit aamma Kalaallit Nunaanni Folketingimut qinersisarneq pillugu inatsit allanngortittariaqarput.

Qitiusumik Inuit Nalunaarsorsimaffiat pillugu Inatsit Inatsisartuni 2006-imi FM06/16-imi Kalaallit Nunaannut atuutsilersinneqarnissaanut aalajangiiffigisassatut siunnersuut saqqummiunneqarmat, § 24, imm. 5 aamma 6 ilanngunneqanngillat. Matumani tunngavilersuutaasoq (eqikkarlugu) imaappoq:

*CPR-imut inatsimmi § 24, imm. 5 aamma 6, Kalaallit Nunaannut atuutilinngilaq. Tamatumani pissutaavoq naalagaaffimmiit Kalaallit Nunaannut aallartitaasut tassanngaanniillu nunanut allanut peqquneqarnermikkut aallartitaasut Kalaallit Nunaanni nalunaarsorsimaannarsinnaallutik pineqartullu taasisinnaallutik peqataanillu Danmarkimi qinersisinnaasut allattorsimaffiannut ilanngunnissamut qinnuteqarsinnaallutik, Folketingimut qinersisarneq pillugu inatsimmi § 16, imm. 1, 2) malinneqarpoq.*

§ 24, imm. 5 aamma 6 peqqussutigineqanngitsut ima paasisassaavoq, inuit Nunanut Allanut Pissutsinut Naalakkersuisoqarfimmiit nunani allani aallartitaanerat ullumikkut Kunneqarfimmiit inuit allattorsimaffianneerput. Ima isumaqarpoq, aallartitaasut Kalaallit Nunaannut angerlarnerminni Kalaallit Nunaanni innuttaasutut inuuniarnikkut, aningaasaqarnikkut innuttaasutullu pisinnaatitaaffitsik nalinginnaasumik atoqqilersinnaagaat. Meeqqat aallartitaaqataasut eqqarsaatigalugit peqqussutaasoq amigaataappat inuuneranni kingusinnerusukkut pisinnaatitaaffiinnut tunngatillugu annaasaqarnermik kinguneqarsinnaavoq.

Siunnersuutaaq naapertorlugu inuit qallunnaat naalagaaffianiit naalagaaffiup avataanut aallartitaasut assigiinnik pisinnaatitaaffeqarfnissaat aamma Kalaallit Nunaannut atassuteqarnerat ingerlaannassasoq qulakkeerneqassaaq. Inuusuttunut Illersornissaqarfimmiit nunanut allanut aallartitaasunut tamanna atuutissaaq. Aammali Kalaallit Nunaanni qallunaat oqartussa qarfiini atorfilinnut aallartitaanissamut peqqusaasunut atuutissaaq. Assinganik inuit Kalaallit Nunaanni inuit allattorsimaffianniittut Nunanut Allanut Pissutsinut Ministeeriaqarfimmit aallartitaasunut atuuppoq.

Inuit Kalaallit Nunaanniit aallartitaasartut qallunaat naalagaaffianniit aallartitaasartunut sanilliullugit assigiimmik pisinnaatitaaffeqannginneri Naalakkersuisunit ajornartorsiutitut igisineqarpoq. Taamatut inisseqqaneq siunnersuuteqarnikkut matumuuna iluarsiniarneqarpoq.

Naalakkersuisut naliliinerat malillugu inuit Kalaallit Nunaanni Namminersorlutik Oqartussanit nunanut allanut aallartitaasussatut peqquneqartut Kalaallillu Nunaanni Namminersorlutik Oqartussanut aallartitaasutut Kalaallit Nunaanni innuttaasutut isigineqassapput Kalaallillu Nunaanni innuttaasut pisinnaatitaaffiininik pisussaaffiinillu assiginik peqassallutik. Aallartitat Nunarput sinnerlugu nittarsaappaat.

1.2 Inatsisitigut aaqqiissutissamik siunnersuut  
Suliap matuma qanoq suliarineqarnissaa Statsministeeriaqarfik aamma  
Justitsministeeriaqarfik peqataatinneqarnikuupput. § 24, imm. 5 aamma 6

ilanngunneqaqqaannginnerini qinersinermi teknikkikkut ajornartorsiuteqarnermik tunngavilersuutitaqarpoq. Tassaallunilu folketingimut kikkulluunniit marloriarlutik qinersisinnaassanngimmata.

Tamanna isumaqatigiinniartitsiffiungaatsiarpoq eqqortumillu aaqqiissuteqarnissaq siunnersuummi takuneqarsinnaasutut suliaqartoqarnissaanut isumaliuteqarfiungaatsiarluni. Savalimmiormiut ilanngunnissamut neqeroorfigineqarsimapputaaq.

CPR-imut inatsimmi § 24, imm. 5 aamma 6 Kalaallit Nunaannut atuutilissasut Naalackersuisunit pingaarnertut siunertarineqarpoq. Tamanna anguneqarpat folketingip inatsisaani pingasuni allannguuteqartoqassasoq kinguneqassaaq.

- Qitiusumik Inuit Nalunaarsisimaffiat pillugu inatsimmi aalajangersakkamik ilassuteqartoqassaaq ilaatigut § 24, imm. 5 aamma 6 periarfissaalerseqqillugit. Peqqussutitut periarfissaaqaartinneqartoq 2006-imi atorineqarpoq.
- Kalaallit Nunaanni Folketingimut qinersineq pillugu inatsimmi aalajangersagartai naleqqussassapput ilaatigut kingunerissallugu Kalaallit Nunaanni Namminersorlutik Oqartussanit aamma qallunaat naalagaaffianiit aallartitat Kalaallit Nunaanni folketingimut qinersinermut taasisinnaatitaasutut nalunaarsorsimasussanngortillugit.
- Folketingimut qinersineq pillugu inatsit allannngortissaaq ilaatigut aallartitap imaluunniit taassuma ilaqutai inuit allattorsimaffiat naapertorlugu Kalaallit Nunaanni najugaqartuusut Kalaallit Nunaanni folketingimut qinersinissamik aalajangersinnaasut qulakkeerniarlugu.

Inatsisartuni aalajangiiffigisassatut siunnersuutip matuma akuersissutigineqarneratigut Folketingimi inatsisit pineqartut allannngortinneqarnissaannut qallunaat naalackersuisui siunnersuuteqassapput.

Siunnersuutip Folketingimi 2023-mi upernaakkut akuersissutigineqarnissaa naatsorsuutigalugu Danmarkimi ministeeriaqarfiup akisussaasup peqqussummik Kalaallit Nunaannut aalajangersagaqartitsisumik atulersitsisoqassaaq.

Inatsisissatut siunnersuut Folketingimut saqqummiunneqartussaq ilanngussaq 1-itut ilanngunneqarpoq, peqqussutitut siunnersuutiginiarneqartorlu ilanngussaq 2-tut ilanngunneqarluni.

Aalajangiiffigisassatut siunnersuutip matuma akuersissutigineqarnerani inatsisissatut siunnersuut (ilanngussaq 1) aamma peqqussutitut siunnersuutigineqartoq (ilanngussaq 2) Inatsisartunit akuersissutigineqassapput, Kalaallit Nunaannut atuuttussaasut.

## **2. Siunnersuummi immikkoortut pingaernerit**

a) Inatsisit atuuttut

I. Qitiusumik Inuit Nalunaarsorsimaffiannut peqqussut

Qitiusumik Inuit Nalunaarsorsimaffiat pillugu inatsit (CPR-imut inatsit) Kunngip

Peqqussutaatigut Kalaallit Nunaannut peqqussutaavoq nr. 1198 Qitiusumik Inuit

Nalunaarsorsimaffiat pillugu inatsit Kalaallit Nunaannut atuutilerluni 29. november 2006-imi peqqussut nr. 449, 23. maj 2016-imi aamma peqqussut nr. 681, 6. juni 2016-imi (CPR-imut peqqussut) allanngortinneqartuni.

CPR-imut peqqussummi § 24, imm. 1 naapertorlugu malittarisassaq pingaerneq tassaavoq, kinaluunniit nunamut aallarluni nuuttoq nuna qimallugu aallarsimasutut nalunaarsorsimassasoq. Ilaatigulli arlaatigut atuunneq ajorpoq, assersuutigalugu nunani allamiinneq qaammatit arfinillit sinnernagit sivissuseqarpat najugarisarluni tamakkiisumik atornerqartarpat. § 24, imm. 5 aamma 6 pingaarnertut malittarisassamut atuutinngillat.

§ 24, imm. 5-imi aamma 6-imi peqqussutitut amigaataasoq ima isumaqarpoq, Nunanut Allanut Pissutsinut Naalakkersuisoqarfiup nunanut allanut aallartitsilluni aallartitaqartitsinera Kunngeqarfik qimallugu allamut nuunnertut inuit allattorsimaffiatigut nalunaarsussapput. Taamaalillutik ukiut tulliuttut marluk ingerlanerini folketingimut qinersinermut taaseqataanissaminnut Københavnip Kommuniani qinnuteqassapput, tassa imaappoq Danmarkimi folketingimut qinersinissamut taaseqataanissamut qinnuteqarlutik.

Aallartitaanerup nalaani Kalaallit Nunaanni innuttaasutut pisinnaatitaaffeqartinneqassanngillat. Aallartitaanermi nalaanni Kalaallit Nunaanniinnerminni peqqinnissaqarfimmit kiffaanngissuseqarlutik kiffartuunneqarsinnaanngillat. Tassa imaappoq arnaq akiliinngikkuni Kalaallit Nunaanni ernisinnaanngilaq. Piniarnissamut pisinnaatitaaffik peqanngilaq. Kalaallit Nunaanni takornariatuulli inissisimassapput.

Tamatuma saniatigut Kalaallit Nunaannut angerlarnerminni Inatsisartut inatsisaat assigiinngitsut malillugit inuuniarnermikkut, aningaasaqarnermikkut innuttaasutullu pisinnaatitaaffeqarnermikkut Kalaallit Nunaannut nutaatut nuussimasutut killilersugaalutik aporfilersorneqassapput. Assersuutigalugu Inatsisartunut aamma kommuninut qinersisinnaatitaaneq, piniarsinnaaneq, qitornap meeqqerivimmumut allatsinnissaanut, initaarnissamut allatsinermut il. il.

Malunnartumik ajornartorsiutaassaaq meeqqat aallartitaaqataasut pisinnaatitaaffimmikkut eqqugaasinnaammata, assersuutigalugu sulisinnaasutut, ilinniagaqarnermi taperneqartarnikkut il. il. Aallartitaareernerup kingorna ukiuni arlalinni sunnuteqarsinnaallutik.

Kalaallit Nunaanni Namminersorlutik Oqartussani atorfeqartut nunani allani kalaallit aallartitaattut inissisimasut nunami sumiiffimminni Danmarkimi Kunngeqarfiup aallartitaqarfiannut pisortatigoortumik inissisimapput. Taamaalillutik nunami

najugarilikkaminni qallunaat aallartitaattut inissisimasutut nalunaarutigineqassapput. Taamaalillutik nunani tamalaani isumaqatigiissutit atuunneranni nunami inatsisit atuuttut malissavaat.

Aamma taamaassaaq Kalaallit Nunaanni, taamaassarlu CPR-imut peqqussummi § 18 malillugu. Nunani allani innuttaasut Nunanut Allanut Pissutsinut Ministeeriaqarfimmi nalunaarsorsimasut CPR-imut nalunaarsuiffimmi nunamut nuussimasutut nalunaarsorsimassanngillat. Taakku ilaqutaannut pineqartup inoqutigiiani ilaappata assingusumik atuutissaaq. Nunani allani sakkutuut Kalaallit Nunaanniinnerat Danmarkimi isumaqatigiissutit iluarsillugu atuutsinneqalersimappat CPR-imi nalunaarsussanngillat.

Islandimut aallartitatut aallartitaasut allannguutini makkunani ilaatinneqarnaviannngillat. Taamaalillutik inuit allattorsimaffiannut nalunaarsuisarnek pillugu Danmarkip, Finlandip, Islandip, Norgep aamma Sverige akornanni nunani avannarlerni isumaqatigiissutaannut 1. januar 2007-meersumut attuumassuteqassapput. Aallartitat Islandimiusut inuttut normoqartinneqassapput taamaalillutik Islandimi inuuniarnikkut, aningaasaqarnikkut innuttaasutullu pisinnaatitaaffeqartitaassallutik.

II. Kalaallit Nunaanni folketingimut qinersineq pillugu inatsit Tunngaviusumik inatsimmi § 29, imm. 1 malillugu Folketingimut qinersisussaatitaaniaraanni naalagaaffimmi aalajangersimasumik najugaqartariaqarpoq.

Kalaallit Nunaanni folketingimut qinersineq pillugu inatsimmi § 3 malillugu inuit nunani allani najugaqarallarsimagaluartut naalagaaffimmut atassuteqarnertik attatiinnarsinnaagaat nalunaarsugaasarpoq. Tunngaviusumik inatsimmi naalagaaffimmut aalajangersimasumik atassuteqarnissamut piumasaqaat taamaalilluni naammassineqarpoq. § 3, imm. 1 malillugu inuit Kommuneqarfik Sermersuumut qinersisinnaanermut allattorsimaffimmut ilanngunnissamut qinnuteqareernikkut nalunaarsorneqartarput. Inuit pineqartut tassaanerupput ilinniartut inuillu pisortani oqartussaasunit aallartitaasut, suliffeqarfiit namminersortut kiisalu taakku katissimasaat. Kalaallit aallartitaasut matumani ullummikkut ilaatinneqarputtaaq.

Inunnut § 3, imm. 1-imut ilaatinneqartunut assigeequtaasooq tassaavoq CPR-imut peqqusut malillugu naalagaaffimmiit nuussimasutut nalunaarsorsimassapput, matumani § 24, imm. 1 malinneqarpoq. Arlaannaalluunniit Kalaallit Nunaanni folketingimut qinersinermut qinersisinnaasut allattorsimaffiannut namminerisamik ilanngutissanngilaq.

Kalaallit Nunaanni folketingimut qinersineq pillugu inatsit Folketingimut qinersineq pillugu Inatsimmi § 2, imm. 1-imisulli aalajangersagaqanngilaq. § 2, imm. 1 malillugu naalagaaffimmi atorfillit naalagaaffiullu avataanut aallartitaasut taakkulu katissimasaat qanorluunniit nunani allani najugaqaralarunik sivisussusaa apeqqutaatinngit naalagaaffimmi aalajangersimasumik najugaqarnerat attatiinnarneqassaaq.

### III. Folketingimut qinersineq pillugu inatsit

Tunngaviusumik inatsimmi § 29, imm. 1 malillugu naalagaaffimmi aalajangersimasumik najugaqarnikkut Folketingimut qinersisinnaatitaaneq piumasaqaataavoq.

Inatsit una malillugu inuit naak nunani allani najugaqaraluarlutik naalagaaffimmut immikkut ittumik atassuteqarnertik attatiinnarsinnaavaat, taamaalillutik tunngaviusumik inatsimmi aalajangersimasumik najugaqarnissamut piumasaqaat naammassineqarpoq.

§ 2, imm. 1 aalajangersagaavoq qallunaat naalagaaffiannit aallartitaasut taakkulu katissimasaat naalagaaffimmi aalajangersimasumik najugaqarnerannik qulakkeerinnittoq taamaalillutik Folketingimut qinersinissamut allattorsimaffimmiiginnarnissaq attatissavaat.

§ 2, imm. 1 CPR-imut inatsimmi § 24, imm. 5 aamma 6-imut ataqatigiipput, ilaatigut aallartitaasut naalagaaffimmiit nuuttutut Danmarkimi nalunaarsorsimassanngitsut qulakkeerneqassammat.

#### b) Siunnersuutip imarisai pingaarnertit

Siunnersuutip pingaarnertut imarisaa tassaavoq, inuit naalagaaffiup avataanut aallartitaasut Kalaallit Nunaanni Namminersorlutik Oqartussanit imaluunniit qallunaat naalagaaffiannit aallartitaagaluarpata naligiimmik pineqassasut qulakkeerneqassasoq. Tamannalu taamaassaaq aallartitaasut Kalaallit Nunaanni imaluunniit Danmarkimi inuit allattorsimaffinniikkaluarpata.

CPR-imut inatsimmi § 24, imm. 5-ip oqaasertalersorneqarnera naapertorlugu Kalaallit Nunaanni Namminersorlutik Oqartussanit aallartitaasut aalajangersakkami ilaatinneqarsinnaasut pingaarnertut malittarisassami § 24, imm. 1 pinngitsoortissallugu. Tamatuma kingorna inatsisiliortoqarluni ilaatigut CPR-imut inatsimmi § 24, imm. 5 aamma 6 Kalaallit Nunaannut pequssutinngorteqqissinnaanngorlugu.

Kalaallit Nunaanni folketingimut qinersineq pillugu inatsimmi aalajangersaanikkut inuit Kalaallit Nunaanni Namminersorlutik Oqartussanit imaluunniit qallunaat naalagaaffiannit naalagaaffiup avataanut aallartitaasut taakkulu katissimasaat nunani allani najugaqarnerat qanorluunniit sivilisussuseqaraluarpat aalajangersimasumik naalagaaffimmi najugaqartutut isigineqassasoq. Tamatuma kingunerissavaa folketingimut qinersinermi qinersisinnaasut allattorsimaffianni ilaassammata.

Naligiinnissaq qulakkeerniarlugu § 2, imm. 1-imiittoq allannguuteqartariaqarpoq, ilaatigut Kalaallit Nunaanni Namminersorlutik Oqartussanit aallartitaasut ilaatinneqarnissaat pillugu malittarisassaqalerluni. Taamatut allannguuteqarnikkut inuit Kalaallit Nunaanni Namminersorlutik Oqartussanit aallartitaasut aallartitaanermi Danmarkimi aalajangersimasumik najugaqartuusut qallunaat naalagaaffiannisulli aallartitaasunut sanilliullugit naligiimmik pineqarnissaat qulakkeerneqassammat.

Indenrigs- og Boligministeriaqarfiup § 16, imm. 1, 2) attatiinnarusuppaa, ilaatigut taanna naapertorlugu aallartitaanerup nalaani Kalaallit Nunaanni aamma Savalimmiuni najugaqartutut nalunaarsorsimasut Danmarkimi qinersisinnaasut allattorsimaffiannut ilanngunnissamut pisinnaatitaaffeqarnissaannut tunngasuummat. Tassa imaappoq Danmarkimi inuit allattorsimaffiat malillugu kingullermik kommunimi najugaqarnerat naapertorlugu. Aalajangersagaq nutaaq ilanngunneqassaaq taannalu malillugu inuit naalagaaffiup avataanut aallartitaasut taakkulu katissimasaat naalagaaffiup ilaani qinersisinnaanermut allattorsimaffimmut ilanngunneqarnissamut periarfissillugit inuit allattorsimaffiat malillugu naalagaaffimmi najugarisaannarminniunngitsoq. Matumani qinersisinnaanermut allattorsimaffimmut ilanngukkusunneranni naalagaaffiup ilaani inuit allattorsimaffiat malillugu nalunaarsorsimaffigisimasaat tunngavigalugu.

Kalaallit Nunaanni aamma Danmarkimi folketingimut qinersinermi taasisinnaaneq pillugu malittarisassat atorneqarnissaat qulakkeerniarlugu pillateqarnermut aalajangersagaq aalajangersarneqassaaq.

#### c) Siunnersuut

Soorlu taaneqareersoq siunnersuut sisamanik immikkoortoqarpoq.

I. Immikkoortoq siulleq pingaarnertullu siunertaasoq allannguutit tamaasa ilanngullugit tassaassaaq, Qitiusumik Inuit Nalunaarsorsimaffiat pillugu inatsimmi § 24, imm. 5 aamma 6 Kalaallit Nunaannut peqqussutitut atuutilersinnaammat. Taamaaliortoqassaarlu danskit naalagaaffiannit aamma Kalaallit Nunaanni Namminersorlutik Oqartussanit aallartitaasut akornanni naliigiissitaanissaq qulakkeerniarlugu.

II. Immikkoortup aappaa tassaavoq Qitiusumik Inuit Nalunaarsorsimaffiat pillugu inatsisip allanngortinneqarnissaa. Tamanna pisariaqarpoq ilaatigut aalajangersakkat peqqussutinngortinneqarniassammata, tassami aallaqqaammut § 24, imm. 5-imut aamma 6-imut peqqussutitut periarfissaasoq peqqussutitigut 2006-imi CPR-imut inatsimmi atorneqarami.

§ 24, imm. 5 allanngortinneqassaaq Kalaallit Nunaanni Namminersorlutik Oqartussani atorfilinnut atuuttunngorluguttaaq. Tamanna ima paasineqassaaq, Københavnimi aallartitaqarfimmiittut kiisalu Danmarkimit sulitinneqartut matumani ilanngunneqassallutik. Imm. 5 aallartitanuinnaq tunngasuvoq.

§ 24, imm. 6 allanngortissaartaaq. Allannguuteqaataasorli tassaavoq aapparisamik nalunaarsugaqarneq piunngimmat, aapparisamik nalunaarsugaqarneq pillugu inatsit atorunnaarnikuvoq. Ullumikkut suaiaqatigiit katissimasinnaapput. Imm. 6 aallartitaasup ilaqutaanut tunngasuvoq.

§ 60, imm. 1, 2-mi § 24, imm. 5-imut aamma 6-imut peqqussutitut nutaatut periarfissamut ikkunneqassaaq.

Allannguutit kingunerisinnaavaat aallartitaasoq taassumalu ilaqtai aallartitaaqataasut ullormi aallarnerminni inuit allattorsimaffiat malillugu najugarisartik attatiinnarsinnaagaat. Tamanna periarfissaanngippat kode qaffasissumik taasartagaat atorlugu inuit allattorsimaffianniitineqassapput nunani allani najugaq ilanngullugu allanneqarsinnaalluni. Inuit aqquserngit qaffasissumik kodelinnik taaneqartartunik nalunaarsorsimasut Kalaallit Nunaanni inuit allattorsimaffianniippat taamaalillutillu Kalaallit Nunaanni inuuniarnikkut, aningaasaqarnikkut innuttaasutullu pisinnaatitaaffilittut pisinnaallutik.

CPR-imut inatsimmi allannguutissatut siunnersuutit Folketingimit akuersissutiginnippagit peqqussutitut siunnersuut atuutilersinneqarnaviangilaq.

III. Immikkoortut pingajuat tassaavoq Kalaallit Nunaanni folketingimut qinersisarneq pillugu inatsimmik allannguissaq.

§ 3-mi immikkoortoq ikkunneqassaaq taannalu naapertorlugu Kalaallit Nunaanni Namminersorlutik Oqartussani atorfillit naalagaaffiup avataanut aallartitaasut taakkulu ilaqtataat naalagaaffiup iluani aalajangersimasumik najugaqarneri aalajangersarneqarlutik. Inuit allattorsimaffianni nalunaarsorsimaneq aqqusinermi qaffasissumik kodeqarnikkut folketingimut qinersisoqartussaattillugu qinersisinnaanermut allattorsimaffimmut nalunaarsorneqarnissaq qulakkeerneqassaaq.

§ 15-imi allannguutit ilaatigut ima kinguneqassapput, inuk Danmarkimi najugalik Kalaallit Nunaanni Namminersorlutik Oqartussanit aallartitaasoq inuit allattorsimaffiat malillugu Kalaallit Nunaanniinnikuusimaguni Kalaallit Nunaanni taasisinnaasutut nalunaarsorneqassanini toqqarsinnaavaa.

Immikkoortut marluusut malillugit folketingimut qinersinermut atatillugu aallartitaasup Kalaallit Nunaannut atassuteqarnini nammineerluni aalajangersinnaavaa.

Aallartitaasup taassumaluunniit ilaqtataata Danmarkimi Kalaallillu Nunaanni qinersisinnaatitaanermut periarfissap aalajangersagartaa atorpavu, § 26-imi ilanngussaq malillugu pineqartup taasina atorsinnaanngitsutut nalilerneqassaaq.

Inatsittaaq allanngortinneqassaaq ilaatigut kalaallit aqqisa eqqortut oqartussanut suliap ingerlanneqarnerani tunniunneqarnissaat qulakkeerniarlugu.

IV. Immikkoortut sisamaat Folketingimut qinersisarneq pillugu inatsisip allanngortinnissaanut tunngasuuvoq.



§ 2-mik allanngortitsineq malillugu Kalaallit Nunaanni Namminersorlutik Oqartussani atorfillit aallartitaasut qallunaat naalagaaffianni aallartitaasunut atukkamikkut naligiimmik atugaqalernissaannik qulakkeerinnittuuvoq. Taanna ima isumaqarpoq, Kalaallit Nunaanni Namminersorlutik Oqartussani atorfilik Kalaallit Nunaanni Namminersorlutik Oqartussanit aallartitaappat, aallartitaanerullu naalaani aallartitaasoq Danmarkimi najugaqarluni, pineqartoq qallunaat naalagaaffianit aallartitatulli assigiimmik pisinnaatitaaffeqassaaq.

§ 16 nutaajuvoq, taannalu Kalaallit Nunaanni folketingimut qinersisarneq pillugu inatsimmi § 15-imut allannguutinut assingusumik aalajangersagaalluni. Aallartitaasoq taassumaluunniit ilaqtai Kalaallit Nunaanni qinersisinnaanermut allattorsimaffimmi ilanngunnissamut qinnuteqarsinnaaneq toqqarsinnaagaat periarfissinneqassapput.

§ 16 a tassaavoq Danmarkimi aamma Kalaallit Nunaanni najugaqartutut taasinissamut qineqqusaarnissamullu periarfissaqarnermut tunngasuuvoq. § 32 malillugu Danmarkimi imaluunniit naalagaaffiup ilaani qineqqusaarsinnaannginnermut tunngatinneqarpoq.

§ 106-imi immikkoortoq nutaaq ikkunneqassaaq ilaatigut Danmarkimi naalagaaffiullu ilaani qinersisoqartillugu imaluunniit innuttaasut qinersitinneqartillugit taasineq imaluunniit qineqqusaarneq kingunerisinnaagaa pillarneqarneq. Pillaaneq ilaatigut akiliisitsinerussaaq imaluunniit qaammatit sisamat tikillugit parnaarussaaneq.

Indenrigsministeriaqarfiup naliliinera malillugu Kalaallit Nunaanni folketingimut qinersinermut atatillugu pillaanermut aalajangersagaq una aamma atuutissaaq. Pisuni marluusuni ima pinerluuteqarniarqarsimassaaq inatsisini pineqartuni ilaat malillugu Folketingimut qinersinermi taasiniarneq imaluunniit qinigassanngortinniarnaq.

### **3. Pisortanut aningaasaqarnikkut allaffissornikkullu kingunerisassai**

Pisortanut aningaasatigut allaffissornikkullu annikitsuinnarmik kinguneqassaaq.

Peqqinnissaaq pillugu inatsit malillugu aallartitaasut taakkulu ilaqtai aallartitaanerup nalaani peqqinnissaaqarfimmi akeqanngitsumik kiffartuunneqassapput. Aallartitaasup imaluunniit taasuma ilaqtasa angerlamut tikissimatinnagit meeqqerivimmut, atuarfimmut assigisaanulluunniit qinnuteqartoqarsimappat taanna kommunimit suliarineqareersimassaaq.

Inuit amerlanngitsut matumani pineqarmata oqartussaqaqfinnut aningaasartuutaasussat aningaasaliissutigeriikkami iluini attanneqarsinnaasut nalilerneqarpoq.

### **4. Aningaasaqarnikkut allaffissornikkullu inuussutissarsiortunut kingunerisassai**

Inuussutissarsiuteqartunut aningaasatigut allaffissornikkulluunniit kinguneqassanngitsooq nalilerneqarpoq.

### **5. Avatangiisinut, pinngortitamut inuillu peqqissusaannut sunniutissai**

Avatangiisinut, pinngortitamut aammalu inuiaqatigiit peqqissusaannut kinguneqassanngilaq.

## **6. Innuttaasunut kingunerisassai**

Aallartitaasumut ilaqutaanullu aallartitaanerup nalaani aallartitaanerullu kingorna kinguneqassaaq. Kingunerisassaali eqqarsaatigalugit annertunerusumik aallartitaanerup nalaaniusinnaapput, Kalaallillu Nunaannut angerlareernerup kingorna annerpaajullutik. Angerlarnermi inuuniarnikkut, aningaasaqarnikkut innuttaasutullu pisinnaatitaanikkut tamakkiisumik atugaqaqqilissapput. Pisinnaatitaaffitik anguniarsareqqissanngilaat.

## **7. Kingunerisassai pingaarnerusut allat**

Allatigut annertunerusumik kingunerisassaqqanngilaq.

## **8. Oqartussanut kattuffinnullu tusarniaaneq**

Aalajangiiffigisassatut siunnersuut tamanut tusarniaassutigineqarpoq piffissami 4. april - 3. maj 2022.

Aalajangiiffigisassatut siunnersuut illuatungerisatut ataaniittunut tusarniaassutigineqarpoq makkununga:

|  |   |
|--|---|
| Avaanata Kommunia                          |   |
| Kommune Kujalleq                           |   |
| Kommune Qeqertalik                         |   |
| Kommuneqarfik Sermersooq                   |   |
| Qeqqata Kommunia                           |   |
| Nunanut Allanut Naalakkersuisoqarfik       | Departementet for Udenrigsanliggender       |
| Aningaasaqarnermut Nunamullu               | Departementet for Finanser og               |
| Namminermut Naalakkersuisoqarfik           | Indenrigsanliggender                        |
| Inuussutissarsiornermut Niuernermullu      | Departementet for Erhverv og Handel         |
| Naalakkersuisoqarfik                       |   |
| Aalisarnermut Piniarnermut                 | Departementet for Fiskeri og Fangst         |
| Nunalerinermullu Naalakkersuisoqarfik      |   |
| Isumaginninnermut Sulisoqarnermullu        | Departementet for Sociale Anliggende og     |
| Naalakkersuisoqarfik                       | Arbejdsmarked                               |
| Ilinniartitaanermut, Kultureqarnermut,     | Departementet for Uddannelse, Kirke, Idræt  |
| Timersomermut Ilageeqarnermullu            | og Kultur                                   |
| Naalakkersuisoqarfik                       |   |
| Peqqissutsimut Naalakkersuisoqarfik        | Departementet for Sundhed                   |
| Nunalerinermut, Imminut Pilersornermut,    | Departement for Landbrug, Selvforsyning,    |
| Nukissiutinut Avatangiisinnullu            | Energi og Miljø                             |
| Naalakkersuisoqarfik                       |   |
| Ineqarnermut, Attaveqatigiinnermullu,      | Departementet for Boliger, Infrastruktur og |
| Naligiissitaanermullu Naalakkersuisoqarfik | Ligestilling                                |
|  |   |
| Aatsitassanut Inatsisit                    | Departementet for Råstoffer og              |
| Atuutsinneqarnerannut                      | Justitsområdet                              |
| Naalakkersuisoqarfik                       |   |

Indenrigs- og Boligministeriaqarfik piffissami pineqartumi inatsisissatut siunnersuut  
illuatungerisanut makkunungattaq tusarniaassutigaa:

Datatsynet, Den danske dommerforening, Formandens Departement i Grønland, Institut for  
Menneskerettigheder, KL, Københavns Universitet (Det Juridiske Fakultet),  
Rigsombudsmanden i Grønland, [Rigsombudsmanden på Færøerne,] Syddansk Universitet  
(Juridisk Institut), Udbetaling Danmark, Valgnævnet, Aalborg Universitet (Juridisk Institut),  
Aarhus Universitet (Juridisk Institut).

### **Ilanngussaq 1:**

Qitiusumik Inuit Nalunaarsorsimaffiat pillugu inatsisip allanngortinnissaanut Inatsimmut,  
Kalaallit Nunaanni folketingimut qinersisarneq pillugu inatsimmut aamma Folketingimut  
qinersisarneq pillugu inatsimmut siunnersuut  
(Danmarkimi Kalaallillu Nunaanni inunnik Kalaallit Nunaanni Namminersorlutik  
Oqartussanit imaluunniit qallunaat naalagaaffiannit naalagaaffiup avataanut il. il.  
aallartitaalluni peqqusaasimasunut kiisalu Danmarkimi Kalaallillu Nunaanni folketingimut  
qinersinermi allattorsimaffimmut ilanngunnissamut tunngatillugu najugaqarnermut  
nalunaarsortinneq)

### **Ilanngussaq 2:**

Qitiusumik Inuit Nalunaarsorsimaffiat pillugu inatsimmi § 24, imm. 5 aamma 6 aamma  
Qitiusumik Inuit Nalunaarsorsimaffiata allanngortinnissaa pillugu inatsimmi § 1, Kalaallit  
Nunaanni folketingimut qinersisarneq pillugu inatsisip aamma Folketingimut qinersisarneq  
pillugu inatsisip Kalaallit Nunaannut atuutsinneqarnissaanut peqqussut  
(Danmarkimi Kalaallillu Nunaanni inunnik Kalaallit Nunaanni Namminersorlutik  
Oqartussanit imaluunniit qallunaat naalagaaffiannit naalagaaffiup avataanut il. il.  
aallartitaalluni peqqusaasimasunut kiisalu Danmarkimi Kalaallillu Nunaanni folketingimut  
qinersinermi allattorsimaffimmut ilanngunnissamut tunngatillugu najugaqarnermut  
nalunaarsortinneq)

### **Ilanngussaq 3:**

Tusarniaanermut allakkiaq